

Akshon! Abo! Awor!

Diariamente hende ta ekspresá preokupashon pa e situashon alarmante ku nos islanan ta enfrentá. Nos tur ke un solushon.

Poko poko nos ta kuminsa realisá ku **ningun komunidad por ta mas fuerte ku su famianan individual**. Famianan ta e blòkinan for di kua un komunidad ta konstruí. Si e blòkinan no ta fuerte, kiko ta para keda di e edifisio?

Ma tin un faktor mas básiko, loke ta e fundeshi riba kua nos komunidad ta konstruí. Poko poko nos ta komprendé ku **rais di nos problema ta moral-spiritual**. Dia tras dia nos fundeshi ta garna mas; skernan spantoso ta aparesé den murayanan di nos komunidad, un señal ku desaster ta na kamina!

Ma laga nos ta mas spesífiko. E antropólogo sosial britániko, J. D. Unwin, tabata e promé pa hasi un estudio ekstensivo di nasementu i morto di 80 sivilisashon. Konklushon sorprendiente di su estudio di shete aña tabata: **komportashon seksual tin un laso estrecho pa ku e sobrevivensia di un nashon**.

For di su estudio el a nota ku kada kultura den historia di mundu a sigui e mésun patronchi seksual. Na komienso di su eksistensia, tur relashon seksual promé òf fuera di matrimonio tabata striktamente prohibí. E mésun era ei tabata karakterisá pa energia kreativo, resultado den prosperidat pa e nashon.

Ma ku tempu, e suidananon ta kuminsá rebeldiá kontra e prohibishonnan, i ta demandá mas libertat pa sasia nan pashon manera nan ta haña ta bon. Ma debilitashon moral ta stanka e energia sosial guiando eventualmente na dekadensia òf destrukshon di e sivilisashon.

Segun Dr. Unwin, e energia ku ta mantené un komunidad intakto i salú ta di índole seksual. Ora un hòMBER ta fiel na ún (1) muhé i ún (1) famia, e ta motivá pa konstruí, protehá, plania, spar, i prosperá pa nan bienestar. Ma, ora su interes seksual ta plamá, e ta usa su energia pa sasia su mes deseonan sensual.

E antropólogo sosial a yega na e siguiente konklushon: “Kada sivilisashon humano ta liber pa demonstrá gran energia òf pa gosa libertat seksual; e **evidensia ta (demonstrá) ku nan no por hasi tur dos pa mas ku un generashon.**”

Paga bon tino! E estudio di Dr. Unwin mester hasi mas ku habri nos wowo! Nos ta kontentu ku hende ta kuminsá lamta fo'i soño i ta realisá ku e problema básiko ku nos islanan ta konfrontá ta moral-spiritual. Sinembargu, sabiendo e echu ei no ta korigí e situashon. **Akshon mester kompañá nos konsensia!**

Si inmoralidat ta kibra nos fundeshinan, **kada un di nos ku ke korigí e situashon tin ku pone un paro na nos mes aktonan immoral**. Ma kiko ta sosodé? Nos ta papia bunita ku moralidat ta rais di nos problema. Ma nos no ta tuma nos palabranan pa nos mes. Manera hopi hende ta mir'è, moralidat ta importante... **pa abo, no pa ami**. Ami por sigui djòdjò ku mi amante, sigui mi bida bibá, sigui kòrta oreá di mi kasá, sigui gosa aktonan homoseksual i lèsbian, miéntras mi ta proklamá ku moralidat ta rais di nos problema! TAN HIPOKRESIA! Si moralidat ta e problema (i e ta!), kada un di nos ta kontribuí òf na e problema òf na e solushon. Palabranan bunita so no ta drecha nada!

Beibel ta papia skèrpi: “..abo, ku ta siña un otro, bo no ta siña bo mes? Abo ku ta prediká ku hende no mester hòrta, bo mes ta hòrta? Abo ku ta bisa ku hende no mester kometé adulterio, bo mes ta kometé adulterá?” (Romanonan 2:21-22).

Nos “ta manera un hende ku ta wak su kara natural den spil; ...(ku a) wak su mes i...a lubidá mesora kon e tabata” (Santiago 1:23-24). Tantu bal ku bo ta wak den spil, mira bo kara ta sushi, anto sigui bo kamina sin laba kara. Tantu bal ku bo **sa** kiko nos problema ta **sin tuma akshon!** Saber ta pidi akshon!

Sabiendo ku rais di nos problema ta moral-spiritual ta drecha nada. Ta tempu pa **akshon**, kuminsándo ku **abo ...awor!**